

Kalata gwa kwanda ugwa Pauli kwa Timoti Isyakulongosya

Timoti aali mwitiki undumyana. Endaga injila nu ntumigwa Pauli ku fynja fingi, antulaga ukulumbilila iNdumi iNunu ijaa Jesu Kilisiti. Piitaasi untumigwa Pauli aalintumile Timoti ukubuka nkukulongosya ikipanga kya Kyala ikya nkaaja akaa mu Efesi.

Pauli aasimbile kalata uju kwa Timoti, isya lubaatiko ulwa mfipanga fya Kyala, ni sya kubasoka nu kubakaanisya abamanyisi baa butungulu nkipanga kya Kyala. Kangi mwa kalata uju, ikulingania uluko ulwa bandu aba bikulondigwa ukusaligwa ukuja balongosi baa fipanga fya Kyala, na muno undongosi ikulondeligwa ukubomba imbombo ni fibugutula ifi filimo nkipanga kya Kyala, bo abatubwa, abakangale na bafwile.

Isi silimo mwa kalata uju
Pauli ikumponia Timoti
Ikansoka isya bamanyisi baa butungulu
Ikulingisania isya lubaatiko ulwa nyiipuuto nu balongosi n
Ikulingisania muno undongosi ikulondeligwa ukubabombel
Ikankasya Timoti mu mbombo jaake

1 Kalata ujū afumile kumyangu une Pauli, ne ntamigwa* gwa Kilisiti Jesu, ku lalagilo lwa Kyala uMpoki gwitū na Kilisiti Jesu ujū jo lusubilo lwitū. 2 Nikukusimbila Timoti gwe mwanangu gwa nalooli ndwitiko. Iliipyana, ulupaakisyo nū lutengaano ukufuma kwa Taata Kyala na kwa Kilisiti Jesu uNtwa gwitū, fijege na nungwe.

Pauli ikundagila Timoti ukujā maaso na bandu aba bikumanyisya isya butungulu

3 Uisyale nkaaja akaa mu Efesi, bo muno naakubulile bo ngusookako kumyinu ukubuka nkiisu ikya mu Maketonija, ukuti ubakaanisye abandu aba bikumanyisya imanyisyo sya butungulu. 4 Baleke ukumilila utusumo utwa ijolo, nū tupango utwa fikolo utu tutikumalika. Isyo sikutwala ulukaani pabūjo bwa lubaatiko lwa Kyala, ulu lukuboneka kumyitu ku njila jaa lwitiko. 5 Inyango jaa lalagilo ulu ko kulonda abilitiki bagananenge ni ndumbula inyeelu, nū lwitiko kisita busyobi. 6 Abandu bamo basilekile isyo, basanukiile ukujoba inongwa imbosya miino. 7 Bikulonda ukujā bamanyisi baa ndagilo sya Moose,† nalinga isi bikusijoba nū kususimikisya bakasimanya.

8 Tameenye ukuti indagilo sya Moose nunu, linga umundu ikusibombela ku bwanalooli. 9 Kangi tusyaganiege ukuti indagilo sikabikigwa kunongwa jaa bagolofu, looli ku basobi, ku

* **1:1** 1:1 Untamigwa Bala iisyu Abatamigwa ku Isyakulingaania. † **1:7** 1:7 Abamanyisi baa ndagilo sya Moose Bala ku Isyakulingaania.

basita kukonga indagilo, ku basita kuntiila Kyala, ku batulanongwa, kuli aba bakaja biikemo, ku banyali mu ndumbula, ku bagoga biisabo na bannabo, na ku bagogi baa luko loosa. ¹⁰ Kangi sibiikiigwe ku balogwe, ku banyambala aba bikulogwa na banyambala biinaabo, kuli aba bikuula pamo bikuulisya abandu mbatumwa, ku batungulu, kuli aba bikulapa isya butungulu pabulongi, pamopeene ni singi syosa isi sitik-witikana ni manyisyo sya nalooli. ¹¹ Imanyisyo isyo sikwitikana ni Ndumi iNunu ijaa Kyala uNsisya, uju ikugindikigwa. Mbeeliigwe une na Kyala ukujifumunya iNdumi iNunu ijo.

Hiipyana lya Jesu Kilisiti kwa Pauli

¹² Nikugwa ulupi kwa Kilisiti Jesu uNtwa gwitw, uju ambeele amaka, paapo aaliinyinogoniile ukaja mbombeli ngolofu. Aaliimbikile mu mbombo jaake, ¹³ nalinga kubwandilo naalintukile nu kubataamya abandu baake nu kubafulasya. Aalimbaakiisye paapo naabombaga isyo kisita kusyagania na kisita lwitiko. ¹⁴ Kangi uNtwa gwitw aalimbeele iliipyana ikulumba, pamopeene nu lwitiko nu lugano ulu luli mwa Kilisiti Jesu.

¹⁵ Ubujobi ubu bwa nalooli, kukuti mundu ikulondigwa ukubwitika, bukuti, “Kilisiti Jesu aaliisile nkiisu ukubapoka abatulanongwa.” Mbatulanongwa abo, une ndi ntulanongwa ukukinda boosa. ¹⁶ Looli Kyala aalimbaakiisye ukuti Kilisiti Jesu anangisye ubooloolo bwake boosa na kumyangw, ne ntulanongwa ukukinda boosa. Aabombile bo ulo ukuti nje gwa

kungeetelamo kuli aba bikummwitikaga, bakabe ubuumi bwa bwila na bwila. ¹⁷ Po leelo ubusisya nu lwimiko fijege kumyake amasiku goosa, Malafyale ugwa bwila na bwila, ujū atikufwa, kangi atikuboneka, jo Kyala mwene. Ameni.

¹⁸ Mwanangu Timoti, nikukulagila ukukongana na masyu agaa bukunguluka agaa ijolo, aga gaajobiigwe kunongwa jaako. Ubombelege amasyu ago ukūja kilwilo kya kulwila ubwite kanunu. ¹⁹ Gumiiile ulwitiko ni ndumbula inunu. Abandu bamo batikusipilikisya indumbula syabo. Kunongwa ijo baloonangile ulwitiko lwabo. ²⁰ Mmbandū abo balimo Imenajo na Alikisanda. Abo nunndekiile Seetano ukuti bamanyile, balingantukaga Kyala.

2

Imanyisyo isya nyiipuuto

¹ Po ilya kwanda ndi syosa, ngubasuma ukuti, mubapyelekesyege, mubiipuutilege, mubasuumilege nu kubagwila ulupi kwa Kyala abandū boosa. ² Mukulondigwa ukubasuumila abanyafyale na bangi boosa aba bali mbulongosi, ukuti tutugalege nu lutengaano, pamopeene nu kantiila Kyala nu kūja nu lwendo ulununu. ³ Ili lyo inunu, kangi Kyala umpoki gwitu iikyeliile nalyo. ⁴ Ikulonda abandū boosa bapokigwe nu kuti bafikepo pakubumanya ubwanalooli. ⁵ Paapo Kyala aliko jumojwene, nu gwa kubafwania abandū na Kyala ali jumojwene. Ujo jo mundū Kilisiti Jesu, ⁶ ujū

aabuningile ubuumi bwake ukuti abaabule abandu boosa. Iji jo ndumi iji aatupeele Kyala pakabalilo akabagile. ⁷ Kunongwa ijo mbiikiigwe ukuya ndumbilili na kuya ntumigwa, ukubamanyisa abandu aba bakaja Bajuuta inongwa sya lwitiko na bwanalooli. Ngujoba isya nalooli, ndikutungulupa.

⁸ Popoosa apa mukubungaana ukwipuuta, ngulonda abanyambala biinulege amaboko pakwipuuta, kisita ngalalisi pamo ukukaanikana. ⁹ Boope abakiikulu ngulonda bafwalege imyenda igya lwimiko. Ku njila ijo bikunangisyaga ulwendo ulununu. Ndikulonda ukwinokesya kubuluke bwa nywili, pamo kukufwala utundu utwa sahabu pamo inyambo, pamo ku myenda igya ntengo unnywamu. ¹⁰ Looli biinokesyege ku mbombo inunu, bo muno sikulondeligwa ku bakiikulu aba bikuti bikuntiila Kyala. ¹¹ Abakiikulu bajege kimyemye na lwijiisyo bo bali pakumanyila. ¹² Ndikummwitikisya unkiikulu ukummanyisa pamo ukuya pabujo bwa kundagila unnyambala, looli ajege kimyemye. ¹³ Paapo Kyala aatalile ukumpela Atamu, alinkukonga Efwa. ¹⁴ Kangi Atamu akaasyobiigwe na Seetano, looli unkiikulu jo ujya aasyobiigwe, aalingiile mbutulanongwa.* ¹⁵ Looli unkiikulu ikwambililaga ubupoki ku njila jaa bupaapi,† linga ikuya mu ndwitiko,

* **2:14** 2:14 Bala kalata gwa Ubwandilo 3:1-6. † **2:15** 2:15 Ubupoki ku njila jaa bupaapi Akanandi aka, bamo bikuti ko kupaapigwa kwa Kilisiti, ukukongana na muno Kyala aajobiile kwa Efwa. Bala kalata gwa Ubwandilo 3:15-16.

ndugano, mbwikemo na mbugolofu.

3

Indagilo ku biimilili baa kipanga kya Kyala

¹ Ubujobi ubu bwa nalooli, ubu bukuti, “Umundu uju ikulonda imbombo jaa kaja mwimilili nkipanga kya Kyala, ujo asalile imbombo inunu.” ² Po umwimilili gwa kipanga kya Kyala ajege mundu uju atikujobigwa kabiibi, ajege mwegi gwa nkiikulu jamojwene, alingasookelaga panja. Iitiimege ndi fyosa, ajege na mahala, ajege gwa kwimikigwa, ajege mwambilila baheesya, amanyege ukumanyisya. ³ Alingajaga ngaala bwalwa pamo ukufulasya abandū, looli ajege mooloolo, alingajwegaga na bandū, alingajaga ni kinyonyo ikibiibi ikya ndalama. ⁴ Ajege mundu gwa kwimilila kanunu inyumba jaake, uju ameenye ukumanyisya abaanaake, bampilikege nu kumpa ulwimiko loosa. ⁵ Linga umundu akabagila ukwimilila inyumba jaake, abagiile buleebule ukwimilila ikipanga kya Kyala? ⁶ Kangi alingajaga mundu uju apindwike mbupiipi, alingiisa kwijumbika nu kulongigwa, bo ulu aalongiigwe Seetano. ⁷ Looli ajege mundu uju bikunnjoba kanunu abandū aba bakaja baa nkipanga kya Kyala, ukuti alingajobigwaga kabiibi nu kukoligwa nu ntego gwa Seetano.

Indagilo ku batuli baa kipanga kya Kyala

⁸ Kangi abatuli baa kipanga bajege bandu aba babagiisye ukwimikigwa, balingasyandulaga syandulaga inongwa, balingajaga bagaala

bwalwa, balinganyonywaga ukukaba ikyuma ku busyobi. ⁹ Bajege bandu aba bikumiihila ubwanalooli ubwa lwitiko ni ndumbula inyeelu. ¹⁰ Bageligwege taasi. Linga baboniike ukuti babagiisye, babombege imbombo ijaa butuuli nkipanga. ¹¹ Kangi abakasi* baabo babagisyeye ukwimikigwa, balingajaga boohesi. Biitiimege na kusubiligwa ndi syosa. ¹² Untuuli ajege mwegi gwa nkiikulu jamojwene, alingasookelaga panja. Kangi abiihililege abaanaake ni nyumba jaake kanunu. ¹³ Aba bikubomba imbombo jaa butuuli bwa kipanga kanunu, bikukaba ulwimiko. Bikuja bakifu ndwitiko ulu bali nalo mwa Kilisiti Jesu.

Ubwanalooli bwa lwitiko lwitu

¹⁴ Nikukusimbila amasya aga, bo ndi na lusubilo ulwa kwisa kumyako mbupiipi itolo. ¹⁵ Linga ngukaabila, usyaganie isi sikulondigwa ukubombigwa na biitiki. Abo kyo kipanga kya Kyala umumi. Ikilundilo ikyo jo mbanda, kangi lwalo lwa nalooli. ¹⁶ Kisita kwilaamwa, isya mbusolofu ndwitiko lwitu ngulumba, syo isi, Kilisiti aabonekiile mu mbili gwa bandu,
 Mbepo ali nkeeti ukuti ngolofu,
 aaboniike ku bandumi,
 aafumusiigwe mfiisu fyosa,
 abandu baa mfiisu fyosa baalimmwitiike,
 aalyegiigwe ukubuka kumwanya
 mbusisya.

* **3:11** 3:11 Abakasi NKigiliki iisya ilyo libagiile ukuja Abakasi baa batuuli pamo Abatuuli abakiikulu.

4

Abamanyisi baa butungulu

¹ Po Mbepo Mwikemo ikujoba pabwelu ukuti, mmasiku gaa kummaliikisyo bamo bikwisa kuleka ukukonga ubwanalooli bwa lwitiko lwitu, bikwisa kukongaga imbepo sya basyobi, ni manyisyo sya mbepo inyali. ² Abandu aba bikumanyisya isyo basyobi, kangi batungulu, indumbula syabo syonangiike, sikufwana syokiigwe ni kyela kya mooto. ³ Abandu abo bikubakaanisya abanyambala ukwega abakiikulu. Kangi bikulagila ukuti abandu balingalyaga ifindu fimo. Looli Kyala aafipelile ukuti, abiiitiki bafyambililege nu kugwa ulupi, paapo babumeenye ubwanalooli. ⁴ Namanga fyosa ifi apelile Kyala finunu, kangi kakajapo akaa kukaanigwa, looli fyambililigwege nu kugwa ulupi. ⁵ Fyelusiigwe ni isyu lya Kyala ni nyipuuto.

Umbombeli unnunu ugwa Kilisiti Jesu

⁶ Linga kubamanyisya abiiitiki imanyisyo isi, po kujaga mbombeli nnunu ugwa Kilisiti Jesu, gwe ukuliile mbwanalooli bwa lwitiko na mu manyisyo inunu, isi ugwe usikongile. ⁷ Utukaanege utusumo utwa bakonyofu utwa bakulu, tukaja ni fya kukabamo. Gwijiisibisyege ukuntiila Kyala. ⁸ Linga kugukasya umbili kukabamo fimo, looli ukuntiila Kyala kukaba fyosa, paapo Kyala afingile ukukupu ubuuni bwa nkabalilo aka, nu bwa nkabalilo aka kikwisa. ⁹ Ubujobi ubu bwa nalooli, kukuti mundu ikulondigwa ukubwitika. ¹⁰ Kunongwa ijo tukwikasya nu kwijwela, paapo

tukunsuubila Kyala uMuumi, uju jo Mpoki gwa bandu boosa, fiijo abiiitiki.

¹¹ Inongwa isyo ulagilege nu kumanyisya.

¹² Ulingiitikaga umundu gwesa ukukwilaamwa paapo uli nkeke. Looli abiiitiki bakeetelengemo kumyako, mbujobi, nkajilo, ndugano, ndwitiko na mbwikemo.

¹³ Gwikasyege ukubabalila abandu Kalata uMwikemo, ukulumbilila nu kumanyisya, mpaka paapo ngwisilaga.

¹⁴ Ulingalekaga ukubombela ikikungilwa iki Kyala aakupееle ukwendela mmasyu gaa bukunguluka, bo abakuulu baa kipanga bakubiikiilepo amaboko.

¹⁵ Gwijuulege ukubomba sisiisyo ni ndumbula jaako joosa, ukuti abandu boosa bakubone muno ujiliile ndi isyo.

¹⁶ Gwikeetege ulwendo ni manyisyo syako. Gumuilile ukubomba isyo, paapo linga kubomba bo ulo, kuponesya ubuumi bwako nu bwa aba bikukupilikisya.

5

Isya bakiikulu abafwile

¹ Ulingankemelaga unnyambala ungangale, looli ummbuulege ngati guuso. Abalummyana ubabuulege ngati baamyinu, ² abakiikulu abakangale ngati nyoko, boope abalindwana ubabombelege ku bwikemo, ngati balumbu baako.

³ Ubiimikege abakiikulu abafwile aba bakaja nu butuuli nabamo. ⁴ Looli unkiikulu umfwile uju ali na baana pamo abiisukulu, abo bo bikulondigwa ukunkeeta, ukuti bamanyile ukubiimika nu kubatula abakamu baabo.

Uko ko kugomola isi boope babombeliigwe na bapaapi baabo. Isyo syo sya kankyela Kyala. ⁵ Unkiikulũ umfwile ujũ akaja nũ mundũ gwa kuntũula, ujũ ansũubiile Kyala, bwila ikwipuuta nũ kusũuma ubutũuli kwa Kyala pakilo na pamuusi. ⁶ Looli unkiikulũ umfwile undũfu kulĩ fyosa, ujũ mfwe nalinga ikũboneka mũumi. ⁷ Syosa isyo ubalagile abiiitiki ukũsibomba, ukũti boosa bajobigwege kanunu. ⁸ Linga umundũ gwesa atikũbatũula abakamu baake, fiijo abaa nnyumba mmyake, ujũ alekile ulwitiko, kangĩ mbiibi ukũkinda umpanja.

⁹ Unkiikulũ umfwile asimbigwege ukũja mfwile gwa kukaba ubutũuli, linga ali ni fyiija 60, kangĩ akaasookelaga panja mbwegi bwake. ¹⁰ Ajege mundũ ujũ ikũjobigwa kanunu kũnongwa jaa mbombo syake, bo ukũbaswila abaanaake kanunu, ukũbambilila abaheesya, ukũbabombela kanunu abiikemo, ukũbatũula aba bikũboneligwa, kangĩ ukũbomba imbombo syosa inunu ni ndumbula jaake joosa.

¹¹ Looli abakiikulũ abakeke abafwile, ulingabasimbaga ukũja bafwile baa kukaba ubutũuli, paapo ifinyonyo fya mbili fikũbapelaga ukũleka ukũmbombela Kilisiti, po bikũlondaga ukwegigwa. ¹² Kũnongwa ijo bikũjaga nũ bulongi mu ndumbula syabo, paapo balũlekile ulũfingo lwabo kwa Kilisiti.* ¹³ Pamopeene na isyo, bikũkabaga akajiilo akaa boolo bo bikũsyunguutila mu nyumba sya bandũ.

* **5:12** 5:12 Balũlekile ulũfingo lwabo kwa Kilisiti Ulũfingo lwabo lwali lwa kusyala kisita kwegigwa kangĩ, bo abalũme baabo bafwile.

Batikujaga nu boolo bwene, kangi bikujaga nu luheeho nu kupanga inongwa isya bangi isi sitikubatuula nafimo aba bikusijoba. ¹⁴ Fyobeene ngulonda abakiikulu abakeke abafwile beegigwege, bapaapege abaana nu kusikeeta inyumba syabo, ukuti balingampapo undugu ubujo bwa kutujoba kabiibi. ¹⁵ Namanga abafwile bamo bapaagwike, bikunkonga Seetano. ¹⁶ Linga unkiikulu umwitiki ali na bafwile nnyumba jaake, jo abakeetege, ukuti ikipanga kya Kyala kilingajaga mbutolwe. Po kikujaga nu bujo bwa kubatuula abafwile, aba nalooli bakaja nu butuuli.

Isya bakuuu baa kipanga kya Kyala

¹⁷ Abakuulu baa kipanga aba bikubomba imbombo kanunu, biimikigwege nu kupeeligwa ifya kubatuula,[†] nnoono aba bikwijuuu ukulumbilila nu kumanyisya. ¹⁸ Namanga Kalata umwikemo ikuti, “Ulingajipinyaga ing’ombe ku kanwa, bo jili pakupuuu inganu.”[‡] Kangi sisimbiigwe, “Umbomba mbombo abagiisye ukuhombigwa umfwalo gwake.”[§]

¹⁹ Ulingajiitikaga inongwa iji ikujobigwa unkuulu gwa kipanga, kisita bukeeti bwa bandu babili pamo batatu. ²⁰ Abakuulu baa kipanga aba bikubomba ubutulanongwa, ubakemelege nkyeni mbiitiki, ukuti abangi batiilege.

[†] **5:17** 5:17 Biimikigwege nu kupeeligwa ifya kubatuula NKigiliki bikuti Biimikigwege kabili. [‡] **5:18** 5:18 Bala kalata gwa Ukukumbuka Ingomeesyo 25:4. Ubujobi ubu kokuti Ing’ombe jibagiile ukulya inganu bo jili pakupuuu, ugo go mfwalo gwa mbombo jaake. [§] **5:18** 5:18 Bala kalata gwa Luuka 10:7.

21 Nikukulagila nkyeni mwa Kyala na mwa Kilisiti Jesu na mbandami abasunguligwa. Usikole isyo syosa, ulongege kisita kwegamila kuli bamo, ubombege syosa ku bugolofu.

22 Ulingakujaga ukumbiika umundu mu mbombo jaa Ntwa, linga ummbiikile untulanongwa, nungwe kunyalaga kunongwa jaa butulanongwa bwake. Ugwe gwikeetege ubuami bwako, ujege mwikemo.

23 Ulinganwaga amiisi geene, looli unwengepo ifinga* panandi, kunongwa jaa pa lwanda nu bubine ubangi ubu bukukutaamya kabili kabili.

24 Abandu bamo, ubutulanongwa bwabo buli pabwelu, butalilepo ukuboneka nkyeni mwa Kyala. Looli abangi, ubutulanongwa bwabo bukaja pabwelu, bukwisa kuboneka nkyeni mwa Kyala pabulongi. 25 Bo lululo, imbombo inunu sili pabwelu, syope inunu isi sikaja pabwelu sikabagila ukufisigwa.

6

Isya batumwa

1 Abatumwa* abiiitiki boosa babiimikege fiijo abatwa baabo, ukuti ingamu jaa Kyala ni manyisyo syitu silingajobigwaga kabiibi.

2 Abatumwa aba abatwa baabo biitiki, balingapepulaga ukubiimika, paapo biitiki biinaabo. Looli bikulondigwa ukubabombela kanunu ukukindapo, paapo abatwa abo boope

* 5:23 5:23 Ifinga Bala ku Isyakulingaania. * 6:1 6:1 Bala iisya Untumwa ku Isyakulingaania.

biitiki baa Kilisiti, kang'i bakundwe baake. Isyo umanyisyege nu kubakasya fiijo.

Imanyisyo isya butungulu nu bukabi bwa nalooli

³ Linga umundu ikumanyisya imanyisyo sya butungulu, isi sikafwana na masyu agaa nalooli agaa Ntwa gwitu Jesu Kilisiti, kang'i sikafwana nu bugolofu, ⁴ ujo iiswile amatingo, kang'i akamanya nasimo. Ali ni kigili ikya lukaani ulwa masyu amanandi, ulu lukutwala ubuufi, ubwite, amahelu, ukwilaamwa ⁵ nu kuumana bwilabwila. Abandu aba bikubomba bo ulu, boonangiike amahala, babulekile ubwanalooli, bikwinogona ukuti ukubomba imbombo jaa Kyala jo njila jaa kukabila ikyuma.

⁶ Ukuntiila Kyala nu kufwana na ifi uli nafyo, ko kukaba ifinywamu. ⁷ Paapo tukaaliisile nafyo nafimo nkiisu, kang'i tutikusookamo nafyo nafimo. ⁸ Looli linga tuli ni fya kulya ni myenda, tufwanenge nafyo. ⁹ Abandu aba bali ni kinyonyo ikya kyuma, bikugwila mu ngelo na mmitego. Bali ni finyonyo fingi ifya bukonyofu, ifi fikubasopa ndoonangiko na mbapyutigwa. ¹⁰ Paapo ukusigana indalama go nsi gwa mbi-ibi nyingi. Bamo aba bikunyonywa indalama, basyobiigwe, balulekile ulwitiko, biifuleesye mu ndumbula ku busulumanie ubwingi.

Isya kumaliikisya

¹¹ Looli ugwe mundu gwa Kyala, usibope isyo. Ukonge ubugolofu, ulutiilo kwa Kyala, ulwitiko, ulugano, ukwikasya nu booloolo.

¹² Gwikasyege ukubomba isi sikukongana nu

lwitiko lwako. Ubukole ubuumi bwa bwila na bwila, ubu aakukooleliile Kyala bo gwitiike ulwitiko nkyeni mbakeeti abingi. ¹³ Nikukulagila nkyeni mwa Kyala uju ikutupa ubuumi utundu toosa, na nkyeni mwa Kilisiti Jesu, uju aajobile ubakeeti bwa nalooli nkyeni mwa Pontio Pilati.† ¹⁴ Ulukolege ululagilo ulo kisita kusoba napamo, kisita kujobigwa kabiibi, mpaka apa bo ikwisa kangi uNtwa gwitu Jesu Kilisiti. ¹⁵ Ukwisa kwake aakukuja pakabalilo aka akabaatiike Kyala, uju ikutuufigwa, mwene jo Ndagili, Malafyale gwa banyafyale, Ntwa gwa batwa. ¹⁶ Ujo jo mwene atikufwa, atugeele ndumuli ulu kakabagila nakamo ukusegelela. Kangi akajako umundu uju ammbwenemo, pamo uju abagiile ukummbona. Ulwimiko na maka ali nafyo amasiku goosa. Ameni.

¹⁷ Ubabwile abakabi baleke ukwijumbika, pamo ukusubila icyuma ikya pakiisu, ikya kabalilo akapimba. Looli bansubilege Kyala uju ikutupapo fyosa ku bwingi, ukuti fituhobosyege. ¹⁸ Ubalagile ukuti babombege inunu, bajege bakabi baa mbombo inunu, kangi bajege bape. Bajege bandu baa kalya icyuma kyabo na bangi. ¹⁹ Ukubomba inunu, bikwibungaanikisya icyuma kumwanya, lo lwalo lwa kwisa kukabila ubuumi ubwa nalooli.

²⁰ Timoti, ubulindilile ubwanalooli ubu Kyala akupeele. Gwepukege ukujoba na bandu inongwa isi sitikummwimika Kyala, nu kukaanikana isya bukonyofu, isi bamo bikuti

† 6:13 6:13 Bala kalata gwa Maalika 15:2.

bo bumananyi. ²¹ Kunongwa ijaa bumananyi ubo,
bamo balulekile ulwitiko.
fliipyana lijege pamopeene na nuumwe.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8